

# KWIKILA KIELEKA NA NZAMBI



Mpe Yawu me tuba mutindu yayi:

*Mpe Elie ya bwala Tishebe, yina vwandaka . . . muntu ya bwala Galad, tubaka na Achab, Mutindu MFUMU Nzambi ya Israel kele ya moyo, yina mu ke musadi, kinoko to mvula ke vwanda ve bamvula tatu yayi, kaka na ndinga na munu.*

*Mpe ndinga ya MFUMU kwisaka na yandi, mpe tubaka,*

*Katuka awa, mpe kwenda na este, mpe bumbana na mwa masa ya Keriti—Keriti, (Mu zola tuba) yina ke na ntwala ya Jourdain.*

*Mpe ya ke vwanda ti, nge ke nwa na mwa masa yina; mpe Mu me tuba na bangoy-ngoy na kupesa nge madia . . .*

*Na yawu yandi kwendaka mpe salaka mutindu ndinga ya MFUMU tubaka: yandi kwendaka mpe zingaka pene-pene ya mwa masa ya Keriti, yina ke na ntwala ya Jourdain.*

*Mpe bangoy-ngoy natinaka yandi dimpa na musuni na suka, mpe dimpa na musuni na nkokila; mpe yandi nwaka na mwa masa yina.*

*Mpe yawu lutaka bantangu fioti, mwa masa yina yumaka samu mvula vwandaka noka diaka ve na ntoto.*

*Mpe ndinga ya MFUMU kwisaka na yandi, mpe tubaka,*

*Telema, mpe kwenda na bwala ya Sarepta, yina kele mosi ya bwala Sidon, mpe vwanda kuna: tala, mu me tinda mufwidi ya kento na kupesa nge madia.*

*Na yawu yandi telemaka mpe kwendaka na Sarepta. Mpe na ntangu yandi kumaka na mwelo ya mbanza, tala, mufwidi ya kento vwandaka lokuta bankuni: mpe yandi bokilaka yandi, mpe tubaka, Natila munu masa ya kunwa, na lemvo ya nge, mwa masa na dikopa, yina mu lenda kunwa.*

*Mpe mutindu yandi vwandaka kwenda baka yawu, yandi bokilaka yandi, mpe tubaka, natila munu, na lemvo ya nge, kitini ya dimpa na diboko ya nge.*

*Mpe yandi tubaka, mutindu MFUMU Nzambi ya nge kele ya moyo, mu ke na dimpa ve, kasi diboko mosi ya mfufu na kitunga, mpe ndambu ya mafuta na dibungu: mpe, tala, mu ke lokuta bankuni zole, mu lenda vutuka mpe yidika yawu samu na munu mpe samu mwana na munu, ti beto lenda kudia yawu mpe kufwa.*

*Mpe Elie tubaka na yandi, Kuvwanda na boma ve; kwenda mpe sala mutindu nge me tuba: kasi sadila munu ntete gateau mosi, mpe natila munu yawu, mpe na manima sala samu na nge mpe. . . mwana ya nge.*

*Mutindu tubaka MFUMU Nzambi ya Israel, kitunga ya faline ata kumana ve, bwati ya mafuta ata kukita ve, tii na kilumbu ya MFUMU ta tinda mvula na zulu ya ntoto.*

*Mpe yandi kwendaka kuna mpe salaka mutindu Elie tubaka: mpe yandi, mpe Elie, mpe yinzo ya yandi, kudiaka bilumbu mingi.*

*Mpe kitunga ya faline kulumukaka ve, bwati ya mafuta kulumukaka ve, mutindu ndinga ya MFUMU, yina tubaka na Elie.*

Samu na disolo ya suka yayi, kaka na ntwala mu kwenda na bayinsi ya nzenza, mu soolaka dilongi, yayi: *Kwikila Kieleka Na Nzambi.*

<sup>2</sup> Ntangu yayi, Mfumu, sakumuna Ndinga na Nge na ntangu Yawu ke basika, mpe bika ti Mpeve-Santu kubaka mabanza mpe bangindu ya beto, mpe kubika beto samu na kumonika na Yandi, mutindu beto lombaka Yandi na kukwisa. Na yawu beto ke kwisaka ve na yinzo ya Mfumu samu na kukimonisa, to kumona, kasi kulonguka Nge, mpe kuzaba nkadulu na Nge, mpe nzila na Nge, mpe balukanu na Nge, ti beto lenda vwanda na kiyeka ya kununga mambu ya luzingu, na kivuvu ya kieleka, na kukwikilaka ya kieleka na Nzambi. Pesa yawu, Mfumu. Na Nkumbu ya Yesu beto ke lomba yawu. Amen.

<sup>3</sup> Yawu lendaka vwanda suka mosi ya mpasi. Yawu vwandaka kilumbu mosi ya mwini ya ngolo mpe ya mfututu, mpe bantu vwandaka na bala-bala, na nzala ya madia, mpe ntoto vwandaka tiya mingi pene-pene ya kuyokama. Nionso yayi vwandaka kifwanisu ya masumu ya bawu mpe kubeba ya kimuntu ya bawu.

<sup>4</sup> Beto ke mona ti, Achab vwandaka ntinu na—na Israel, na ntangu yina, to na zulu ya Israel, mpe yandi vwandaka ntinu ya yimbi kulutila bantinu nionso ya Israel. Kuvwandaka na ntinu ya yimbi ve mutindu Achab, samu yandi, longamaka mpe zabaka mbote-mbote yinki kusala, yandi vwandaka kaka kuniongisa Nzambi na mambu nionso yina yandi vwandaka kusala. Ata mutindu yina yandi vwandaka na basoda ya ngolo, mpe bantu kumaka na bumvwama mingi na nsi ya luyalu na yandi, kasi, diaka, nge lenda ve kuniongisa Nzambi mpe kubanza kukwenda na ntwala.

<sup>5</sup> Mpe diaka, na makwela na yandi, na kisika ya kukwela na kati ya bantu ya yandi mosi, yandi kwendaka na nganda mpe kwelaka nsumuki, musambidi biteki, muntu yina vwandaka sambila biteki. Yandi kwelaka Jezabel. Mpe yandi vwandaka mukwikidi ve.

6 Mpe ata mbala mosi ve mukwikidi lendaka kwela mumpani, ata mbala mosi ve. Bawu lendaka kwelana kaka na bakwikidi.

7 Kasi Achab salaka diambu yayi ya yimbi. Mpamba ve ti Jezabel vwandaka kento mosi ya kitoko. Mpe yandi kubwaka samu na kitoko na yandi, na kisika kutala yina yandi vwandaka. Bantu mingi diaka, ke sala kifu ya mutindu yina bubu yayi.

8 Mpe yandi kotisaka bisambu ya biteki na yinsi, na kati ya bantu. Mpe bantu, banganga-Nzambi, balongi ya bawu, kubwaka na kulomba yayi ya bantu nionso.

9 Mpe yawu ke kifwanisu ya nene ya yinsi na beto bubu yayi. Beto me kubwa na nsi ya kulomba ya bantu nionso. Na ntembe ve ti banganga-Nzambi banzaka ti yawu lenda vwanda mbote mingi, na mutindu luyalu na bawu ndimaka yawu. Kasi mu ke tala ve yina luyalu ke ndima, yawu lendaka vwanda kaka yina Nzambi ke ndima. Mpe bantu banzaka ti yawu lenda vwanda mbote mingi kana bawu lenda sala mambu ya bawu ya yinza.

10 Mpe muntu mosi lenda lomba munu na kutendula diaka yina mu me tuba, ti yawu vwandaka kifwanisu ya bubu yayi. Beto lenda banza ti beto ke basambidi biteki ve, kasi beto kele basambidi biteki. Mpe luyalu ke ndima yawu. Bantu kele basambidi biteki bubu yayi, samu bawu—bawu ke sambila biteki. Mingi kati na bawu ke sambila bantu ya cinema, mutindu biteki. Mingi kati na bawu ke sambila mbongo, mutindu biteki. Mpe bayankaka ke sambila bantu ya television, mutindu biteki. Kasi nionso yina ya beno ke tula na ntwala ya Nzambi kele kiteki, yawu vwanda konso kima yina.

11 Ata Satana, mbeni na beto ya nene, kele mosi ya mayele ya yimbi, mpe yandi ke tula, na bantangu yankaka, yinzo-Nzambi na ntwala ya Nzambi. Beno lunga vwanda na yinzo-Nzambi mosi ya nene. Yawu lunga vwanda yinzo mosi ya nene, to yawu lunga vwanda denomination mosi ya nene. Mpe, diaka, yawu lunga vwanda dibuundu mosi ya nene, kasi kubika kima mosi ve kukwisa na ntwala ya Nzambi, na kati ya ntima na beno. Konso kima yina kele na ntwala ya Nzambi, kele kiteki.

12 Mpe bantu yayi zabaka ti bawu vwandaka ve ya kimpeve mutindu bawu vwandaka ntete, na nsi ya bimfumu ya bantinu yankaka. Mpe bawu banzaka ti, samu bawu vwandaka yinsi ya bantu yina ke sambilaka mingi, ti konso kima lendaka tambula mbote kaka. Beto me kuma mpe na kisika yina.

13 Bangonda mingi me luta mu vwandaka solula na nkundi ya munu ya zola. Mpe yandi tubaka, “Mpangi Branham, mu ke mona ti nge ke na mawa ya yinsi Etats-Unis ve.” Yandi tubaka, “Nge ke nganina ntangu nionso disumu mpe yinki mutindu Nzambi ke pesa ndola na yinsi yayi.”

14 Mu tubaka, “Yandi ke sala yawu, samu na kuvwanda ya kieleka.”

Yandi tubaka, “Kasi, Mpangi Branham, nge me zimbana ti yinsi yayi me tungamaka na zulu ya Masonuku. Mpe batata na beto kwisaka awa, mpe Nzambi pesaka na beto kimvwama yayi. Mpe beto kele yinsi yina bantu ke sambilaka mingi.”

<sup>15</sup> Mu tubaka, “Yina ke kieleka, na muvimba na yawu. Mpe muntu mosi ve zaba yinki mutindu mu ke sepelaka na yinsi yayi! Kasi, tala, mpangi ya munu, Israel mpe soolamaka na Nzambi, mpe Yandi tindaka ba profete ya yandi mpe bantu ya nene. Kasi Nzambi lenda kangila disumu ntima ve. Yandi salaka ti Israel kubuka konso mbuma yina bawu kunaka. Mpe kana Yandi salaka ti Israel kubuka yina yandi kunaka, Yandi ke sala diaka ti beto buka yina beto kunaka. Yandi ke katula muntu ve.”

<sup>16</sup> Mpe beto me kuma na kisika yina beto ke banza ti samu beto ke pema na zulu ya yina batata ya beto salaka, to na zulu ya bantu ya nene yina bandaka mabuundu ya beto, bawu pesaka munkayulu na bawu ya nene na Nzambi, nionso yina ke mbote mpe beto zola yawu mingi, kasi beto lenda kuzwa ve mpulusu ya beto na yina bawu salaka! Mpulusu ke diambu ya konso muntu na Nzambi. Beto ke pesa mvutu ve, na yinsi na beto, to na dibuundu na beto, kasi beto mosi kaka na ntwala ya Nzambi.

<sup>17</sup> Yawu ke baka kisika na yinsi ya beto, ata mpe na kati ya bantu ya kimpeve yina beto kele na bawu, ata mpe beno kwenda na babakala na bakento ya kimpeve, mpe beto ke mona ti bawu ke kondwa kima mosi.

<sup>18</sup> Beto vwandaka, na mwa bilumbu me luta, mu longukaka mwa mambu yayi, mpe mu monaka ti bantu yina mu banzaka ti bawu ke makunzi, mu monaka diaka ti bawu ke tula bantima ya bawu na mambu ya ntangu fioti, bawu ke baluka mpe ke tuba, “Nzambi me pesa munu kima ya kulutila nene *yayi to yina*. Nzambi me pesa . . .” Beno ke sala nsaka.

<sup>19</sup> Kimvwama ya mingi ke talisa ve kaka ntangu nionso luzolo ya Nzambi. Nzambi ke nokisaka mvula na zulu ya bantu ya mbote na ya yimbi. Kasi yina yinza kele na yawu nsatu bubu yayi kele lukwikilu ya mpamba-mpamba ve, kumeka kusala mambu na mutindu ya beno mosi mpe kubokila yawu diambu ya kimpeve.

<sup>20</sup> Bantangu yankaka lukwikilu ke sala bimangu ya nene, ata mpe yina me katuka ve na ntima ya kimpeve. Mfumu ya beto tubaka ve ti, “Mingi ke kwisa na Munu, kilumbu yina, mpe ke tuba, ‘Mu salaka ve *yayi na yina*, na Nkumbu na Nge?’ Mpe Mu ke tuba na bawu, ‘Beni kwenda ntama na Munu, beno misadi ya masumu ya nku.’” Yinki yayi ke disumu ya nku? Kele kima yina nge ke zaba kusala yawu mbote-mbote kasi nge ke sala yawu ve. “Mu zabaka beno ata fioti ve,” Yandi ke tuba mutindu yina. Mpe beto ke zinga na kilumbu yango.

<sup>21</sup> Beto ke na nsatu ya bimvwama ya bima mingi ve bubu yayi. Beto ke na yawu. Beto ke na nsatu ve ya bayinzo-Nzambi ya

nene. Beto ke na nsatu ve ya mabuundu ya nene. Beto ke na nsatu ve ya bansangu mingi na radio mpe na television. Beto ke na nsatu ve ya mingi ya bima yayi. Kasi yina beto ke na yawu nsatu bubu yayi, samu na kuvwanda ya kimpeve, muntu yina ke kukikulumusya yandi mosi na ntwala ya Nzambi, ata bawu kele na mbongo ve, mpe bawu ke sambila tii kuna mpeve yina ke na kati ya bawu ke sepela na mawete ya Nzambi, mpe mvumbukulu mosi kubaka kisika na kati ya bantima ya bawu, yina ke soba bikalulu ya bawu mpe nzingilu ya bawu.

<sup>22</sup> Beno lenda kondwa sapatu na makulu ya beno, beno lenda lwata bilele ya kufwa, kasi na kati ya bantima ya beno kima mosi ke yimbila mikunga ya Nzambi. Mu ke sepela na yina na sika kuvwanda na mbongo nionso ya yinza.

<sup>23</sup> Beno lenda tuba ve ti bimvwama ya ntoto kele ntangu nionso kidimbu ya lusakumunu ya Nzambi. David tubaka na Mfumu ti, yandi monaka muntu ya yimbi ya nene mingi . . . mutindu yinti ya nene ya yinda. Kasi Nzambi yufulaka yandi, “Nge me monaka nsuka na yandi?” Ata beto ke lwata bilele ya kitoko, ata beto kele na mingi ya madia, yawu yina ve ke kwendaka na Ntwala ya Nzambi. Nzutu yayi ya beto ke zingila, ke fwa, kukondwa kutala yinki mutindu beto ke keba yawu. Kasi yawu kele moyo yina kele na kati ya muntu; yawu ke mutindu ya mpeve yina ke kwendaka na Ntwala ya Nzambi ya moyo.

<sup>24</sup> Kasi beto ke banza ti mambu nionso ke tambula mbote. Beto ke banza ti samu beto ke yinsi mosi . . . Mutindu yina Achab mpe Israel, nionso salaka, na kilumbu yina, bawu bakaka bima nionso na zulu-zulu, ti konso mambu vwandaka tambula mbote mingi. Banganga-Nzambi ya bawu mpe balongi ya bawu vwandaka tuba na bawu ntangu nionso, “Nionso kele mbote. Nionso kele mbote mingi.” Kasi vwandaka na mosi, yina vwandaka telemina bima ya yimbi, samu muntu yayi zabaka ti Nzambi ya santu lenda sepela ve na bisambu ya kukondwa busantu ya bilumbu yayi.

<sup>25</sup> Na yawu Nzambi ya Zulu ke bikala kaka mutindu mosi bubu yayi. Ngolo na beto nionso mpe mambu ya nene nionso beto ke meka na kusala, Nzambi ke sepela na yawu ata fioti ve kukondwa luzingu na beto ya busantu na ntwala na Yandi.

<sup>26</sup> Beto lenda tunga balukolo, mpe bisika ya nzietelo, mpe ba tabernacle. Beto lenda vwanda na ba organisation. Beto lenda sala bima ya nene, kasi Nzambi ke sepela ve tii kuna moyo ya muntu ke santisama na autel ya Nzambi, yina me kukipesa ya muvimba na bisalu ya Nzambi. Mpe beto ke monaka yawu diaka ve.

<sup>27</sup> Beto ke mona ti balukutakanu ya bisambu ya beto kele ya kulemba mingi, kaka mwa muniti fioti ya bisambu, beto me mata na mbeto. Mbala yankaka beto ke sala yawu mbala mosi to zole na kilumbu ya muvimba. Na ntangu yina, beno nionso

me bedisama. Yinsi ya beto, kele ya kubeba, na kimuntu. Beto ke na ba Billy Graham mpe ba Oral Robert bisika nionso. Kasi tii kuna nsatu mosi ke kwisa na ntima ya Amerique, kuvutula yawu diaka na Nzambi ya moyo, na nzingilu ya moyo, na lukwikilu yina ke fwaka ve na Nzambi ya moyo, kasi beto ke basisa ngolo, ya mpamba, mutindu yawu lendaka tubama.

<sup>28</sup> Beto lenda tambula na bantulu ya beto ya kuvimbisa, na bakole ya bilele ya beto ya kubalula na manima, mpe kutambula na bala-bala, mpe beto ke zola ti bawu bokila beno “Docteur” to “Reverend.” Beto lenda vwanda ba pasteur ya mabuundu ya nene yina ke na yinza, mpe beto lenda vwanda bantu ya busantu mutindu beto lunga vwanda, ata ti muntu mosi ve lenda songa musapi na baluzingu ya beto. Kasi tii kuna moyo yina kele na kati ya beto ke pela na tiya samu na Nzambi, tii kuna kima mosi na kati ya bawu, ke vwanda na nsatu ya Yandi! “Mutindu mbambi kele na mpwila ya masa, moyo na munu kele na nsatu na Nge, O Nzambi.” Tii kuna beto ke baka nzingilu ya mutindu yina!

<sup>29</sup> Na yawu, communisme, mpe yina yankaka, ke baka ntoto mutindu bawu kele na kusala yawu, mpe bimvuka yina nionso beto lenda sala ke kanga yawu ve. Yawu zabisamaka na ntuala ti yawu ke kwisa. Kasi Nzambi ke bokila Dibuundu ya Yandi.

<sup>30</sup> Yinki mutindu mwana kento yayi vwandaka ya mutindu mosi na Elie! Mpamba ve, bisalu na beno ke talisa ntangu nionso yina beno kele. Mpe, diaka, yandi soolamaka na kuyamba profete ya Nzambi. Bambuka moyo, yandi vwandaka Muntu ya makanda, Juif ve.

<sup>31</sup> Mpe ntoto vwandaka mutindu kuyokama. Mpe na ntembe ve ti mwana kento yayi, vwandaka ya mutindu ya mbote, yandi vwandaka mbandu ya mukwikidi. . . Beto ke mona ti Nzambi lendaka bokila yandi ve, kana yandi vwandaka ve yina lungaka yamba profete ya Nzambi. Yandi lendaka tinda ve profete ya Yandi na yinzo yina vwandaka ya kulunga ve.

<sup>32</sup> Yawu vwandaka nsodolo ya yandi ve. Yawu vwandaka nsodolo ya Nzambi. Kento yina ve bokilaka yandi. Yawu vwandaka Nzambi yina bokilaka yandi. Yandi tulamaka na lweka ya mwa masa. Bangoy-ngoy vwandaka pesa yandi madia. Kasi yawu vwandaka luzolo ya Nzambi ti kima mosi kusalama. Mpe ya kieleka Nzambi kwendaka na mukwikidi ya mutindu mosi na Elie.

<sup>33</sup> Yandi vwandaka mufwidi ya kento. Mpe beto nionso zaba yinki ntangu yandi, mufwidi ya kento, lendaka lutisa na bakala yina me fwaka mpe mwana ya kubokula.

<sup>34</sup> Mpe kuna na ntoto na bawu, bawu vwandaka zingila bambuma ya bayinti. Bawu vwandaka ve na balukanu mutindu beto ke na yawu bubu yayi, mpe—mpe lutaninu ya bayinti. Bawu vwandaka zinga na bambuma ya bilanga ya bawu. Mpe masumu

ya nku ya bantu, mpe kubwa ya kimuntu ya bawu, nataka kuyuma na ntoto, awa bawu nionso vwandaka na nzala ya madia mpe vwandaka kufwa.

<sup>35</sup> Na ntembe ve beto ke mona ti yandi sambilaka mpimpa na manima ya mpimpa, mpimpa ya muvimba, yandi bandaka na kumona kitunga ya faline ke kulumuka, ke kulumuka, ke kulumuka. Mpe yawu kumaka na kisika mosi ti yawu vwandaka diaka ve na mwa dikopa ya faline na kitunga. Yandi vwandaka kaka na mwa diboko ya faline. Lufwa vwandaka kwisa na mwelo ya lupangu na yandi, na kielo ya yinzo ya yandi. Mutindu ya kuzwa yankaka vwandaka ve. Yinsi ya muvimba vwandaka na nzala ya madia.

<sup>36</sup> Mpe, mafuta, yawu vwandaka kaka na lutu mosi yina bikalaka na bwati ya fioti. Yina ke kteso ya mafuta mpe ya faline yina vwandaka kati-kati ya yandi mpe lufwa. Yandi lendaka vwanda na kieleke mingi na bisambu na yandi. Beno bika ti yawu kota na yinzo ya beno, kana beno lenda vwanda na mingi ya kieleka kulutula yina beto ke na yawu na suka yayi, na ntangu beto ke zaba ti lufwa me vwanda na kielo ya yinzo ya beto.

<sup>37</sup> Mpe mu ke kwikila ti, mbala yankaka, beto ke banza ti, mbala yankaka, yayi, ti yandi sambilaka mpimpa ya yinda, kilumbu ya muvimba lendaka lunga. Yandi lendaka tala bikoba ya kuyuma ya mwana na yandi ya fioti ya bamvula tatu to yiya. Mpe yandi lendaka tala mikwa na yandi mosi ya kukonda mingi, mutindu ti misuni vwandaka me katuka na yawu. Mpe yina lenda vwanda kima mosi ya mpasi mingi, na mama ya mutindu yayi, na kumonaka mambu ke tambula mutindu yayi. Mpe, ntete, na maboko na yandi na ntwala ya Nzambi, mpe sambilaka na mwini mpe na mpimpa, “Ntangu yayi beto ke kaka na diboko mosi ya faline mpe lutu mosi ya mafuta.”

<sup>38</sup> Beno zaba ti, yawu ke diambu ya ngitukulu. Bika ti Nzambi kotisa yawu mbote-mbote na kati ya mosi na mosi ya beno, kana beno kuwa malongi ya munu diaka ve. Bika ti yayi kuvwanda nsangu. Yawu ke ya ngitukulu, ya ngitukulu mingi, ti na bantangu yankaka Nzambi ke salaka mambu ya mutindu yina.

<sup>39</sup> Beno zaba ti, na ntangu beto me lomba lemvo ya masumu ya beto mpe beto me zitisa misiku nionso ya Nzambi. . . .Beto me kwikila na Nzambi. Kele na ndiatulu ya kulanda, mpe yawu kele na kulandaka luzolo ya Yandi. Mpe na ntangu beto me lomba lemvo ya masumu ya beto, mpe beto me sungika mambu nionso ya yimbi beto salaka, mpe me sungika yawu mbote-mbote, beto me sala konso kima na mutindu yawu lendaka salama. Konso musiku yina Nzambi pesaka, to lombaka beto, beto me zitisa konso musiku, kasi Yandi me vwanda kaka swi. Yandi ke pesa beto mvutu ve.

<sup>40</sup> Mu ke ndima ti mu ke tuba, na bantu yina me kuma na kisika yina, na suka yayi. Mu vwandaka mpe na kisika yina,

na bantangu mingi, munu mosi. Na ntangu mu vutukaka fioti na manima mpe talaka mbote-mbote konso kima ya luzingu na munu, mpe mu monaka ti mu salaka kima mosi ya yimbi, mu lunga kwenda yidika yawu mpe kutuba, “Mfumu Nzambi, mu me yidika yawu mbote-mbote,” mpe mu vwandaka sala yawu. Mpe mu vwandaka vutuka mpe kutuba, “Ntangu yayi, Mfumu, Nge ke Nzambi; Nge ke pesa munu mvutu. Ya kieleka mu me nionso yina Nge lombaka munu na kusala. Mpe mu me zitisa konso musiku.” Mpe Yandi ke nikana kaka ve, yawu ke monana mutindu ti Yandi me vwanda kaka swi, yina ke ntangu beno lenda ndima ya kieleka ti Yandi ke Nzambi. Kulemba nzutu ve. Kima mosi kaka, ti, na kati ya bantima ya beno, kwikila kieleka na Nzambi.

<sup>41</sup> Dilongi ya munu. Kwikila kieleka, ntete-ntete, na ntwala ya kusala konso kima. Kwikila kieleka, na kati ya ntima na nge, ti yawu ke Nzambi. Mpe na ntangu beno me sala konso kima yina Yandi tubaka, beno ke ndima ya kieleka ti Yandi ke Nzambi, keke na ntangu yina lukwikilu ke kota na kisalu, kaka ntangu yina. Lukwikilu me telema mbote-mbote, samu yawu zaba mbote ti Yandi keke.

<sup>42</sup> Mpe beno me zitisa konso musiku. Beno ke kwikila ti Yandi keke, mpe lukwikilu me simba mbote-mbote. Oh, Nkumbu ya Yandi kubaka lukumu! Lukwikilu ke ningana ve, samu yawu ke ndima ya kieleka ti Nzambi keke, mpe ya ke yina ke pesaka lufutu na bayina nionso ke sosaka Yandi.

<sup>43</sup> Bika ti yayi kukota ya kieleka na kati na beno mpe yawu katuka na beno ata fioti ve, Branham Tabernacle. Kana beno me zitisa misiku nionso ya Nzambi, mpe beno ke kwikila na kati ya bantima ya beno ti Yandi keke, Nzambi ke meka kaka lukwikilu ya beno, samu Yandi ke zolaka kusala mutindu yina. Beno me lomba lemvo ya masumu ya beno mpe beno me zitisa konso musiku yina Nzambi pesaka, mpe Yandi me vwanda kaka swi, bambuka moyo, lukwikilu ke tuba ti Yandi keke. Na yawu lukwikilu me telema ngwi na yawu, kukondwa kuzaba ve yina nionso me tadila yawu, kasi yawu zaba ti Yandi keke, mpe yawu keke na kieleka ti Yandi keke.

<sup>44</sup> Na yawu, bambuka moyo, kana Yandi keke, Ndinga ya Yandi keke ya kieleka. Mpe kana Yandi tubaka na beno na kusala mambu yayi, mpe beno me sala yawu, Yandi me tindama na ngolo nionso na kuzitisa Ndinga ya Yandi. Kuvutuka na manima ve, na kutubaka, “Mbote, mu me beluka ve. Munu . . .” Oh, nge lukwikilu ya fioti, ya kulemba. Beno kwikila na yawu ve. Kana beno me sungika konso kima, mpe nionso me basika, mpe beno me zitisa musiku ya Nzambi, lukwikilu ke simba mbote kuna. Kima mosi ve ke ningisa yawu. Yandi keke, mpe beno ke ndima yawu. “Bayina nionso ke tula ntima na Mfumu, bawu ke vutula ngolo ya bawu; bawu ke pamuka na zulu mutindu mpongo. Bawu



ke baka ntinu nkatu kulemba; bawu ke tambula, kukondwa bawu lemba.”

<sup>45</sup> Beno vingila, na ntangu beno me zitisa misiku ya Yandi. Yawu ke nata lukwikilu ya beno na kumekama. Kana beno me zitisa. . . Ba misiku ya Nzambi pesaka, to beno me zitisa yawu, mpe beno me baka yawu mbote-mbote, mpe beno me sala yina Nzambi tubaka na beno, lukwikilu na beno ke telema kaka kuna, ti Yandi kele. Kwikila kieleka na Nzambi.

<sup>46</sup> Beno zaba ti, Yandi ke zolaka kumeka beto. Yandi ke zolaka kumona mvutu ya lukwikilu ya beno. Beno zaba yawu? Nzambi zola mona yinki beno ke sala. Na ntangu beno ke tuba, “O Mfumu, mu ke kwikila na Nge. Nge ke Mvulusi ya munu. Mu ke kwikila ti Nge ke Munganga. Mu ke kwikila ti Nge ke Mosi yina ke pesaka Mpeve-Santu. Mpe bima yina mu ke na yawu nsatu, Nge ke Nzambi yina ke pesaka munu yawu.” Mpe na ntangu beno me sungika masumu na beno nionso mpe beno me sila na Nzambi yina beno ke sala kana Yandi me belusa beno, mpe kana yawu ke salama ve, beno ke kwenda ntama mutindu muntu ya boma. Nzambi ke salaka na muntu ya mutindu yina ve. Samu na Yandi mutindu ya kusadila beno kele ve. Yandi lunga sadila beno ata fioti ve, samu Yandi ke pesaka kaka mvutu na nzila ya lukwikilu. Na yawu, na nswalu nionso, beno ke kwenda ntama, mpe Yandi lenda pesa beno mvutu ve. Kasi ya kieleka, lukwikilu ya kieleka ke telema kuna, mpe ndima ti Nzambi kele. Yandi ke kwikila ti Yandi kele.

<sup>47</sup> Mpe kana Nzambi lomba na beno na kusala yayi, mumbandu kusungika masumu ya beno, mpe nionso yina, mpe beno me sala yawu, lukwikilu ke tuba ti Yandi kele, yawu ke kwikila ti yawu ke salama. Beno ke baka mvutu ya ndombilu ya beno. Oh, mu—mu ke na kivuvu ti beno ke luta na lweka na yawu ve. Kana beno ke ndima ya kieleka na Nzambi, Nzambi ke ndima ya kieleka Ndinga ya Yandi. Yandi ke meka beno kaka.

Yandi me salaka yawu na bambala mingi. Beto vutukila mosi to zole ya bambandu.

<sup>48</sup> Beto bambuka moyo samu na bana Hebreux. Bawu fukiminaka biteki ve. Nzambi tulaka kivuvu na bawu. Mpe na ntangu bawu waka ti bawu ke kwenda na dibulu ya tiya, bawu tubaka, “Nzambi ya beto kele na kiyeka ya kubasisa beto na dibulu ya tiya yina. Kasi kana Yandi sala yawu ve, beto ke fukimina biteki na beno ve.” Beno me mona, bawu ndimaka mpe kwikilaka kieleka na Nzambi.

<sup>49</sup> Bawu zabaka ti Yandi vwandaka Yehowa. Bawu zabaka ti Yandi ke pesaka mvutu na bisambu. Kasi ata Yandi kotaka na diambu na bawu, to ve, bawu bakaka kiyeka na bawu. Na yawu bawu bakaka lukanu ya bawu, bawu sungikaka masumu ya bawu, mpe tambulaka na kati ya lufwa.

<sup>50</sup> Na ntangu bawu vwandaka kwenda na dibulu ya tiya, bawu vwandaka na lukwikilu, ti, kana Nzambi kubika bawu kuzika na tiya, Yandi lunga vumbula bawu diaka, na mvumbukulu. Bawu kwikilaka na Nzambi, samu bawu zabaka ti Nzambi lendaka sala konso kima samu na mambote ya bawu. Mpe na ntangu beto me kwikila na Nzambi, beto zaba ti Nzambi ke sala konso kima samu na mambote ya beto.

<sup>51</sup> Na yawu, bawu bakaka lukanu mosi. Bawu kwikilaka kieleka, mpe bawu kwendaka tii kuna na tiya. Mpe Nzambi bikaka bawu kota kuna; mpe vwandaka kuna, ke tala bawu. Yandi zolaka mona yinki bawu ke sala.

<sup>52</sup> Na ntangu, ntinu tubaka, “Beno me fukimina na ntangu mpungi bulaka?”

Bawu tubaka, “Ve. Beto me fukimina ve.” Tala lukwikilu ya beno, ya kusimba mbote-mbote.

“Mbote, na yawu, kana beno fukiminaka ve, beno zaba musiku ya munu?”

“Yinga, beto zaba musiku ya nge.”

“Mu ke lomba ti dibulu ya tiya kupela diaka mbala sambwadi kulutila mutindu yawu vwandaka ntete, mpe mu ke losa beno kuna na kati. Beno zola fukimina ntangu yayi?”

“Ve. Beto ke fukimina ve.” Beno tala lukwikilu yina.

<sup>53</sup> Nzambi tubaka, “Mbote, Mu ke tala yina bawu ke sala. Munu ke tala yina lukwikilu ya bawu ke sala.”

<sup>54</sup> Na yawu Yandi tubaka, “Beno kanga maboko ya bawu, mpe makulu ya bawu, mpe beno losa bawu na dibulu ya tiya.” Mpe bawu pusanaka na dibulu ya tiya yina, mpe tiya vwandaka sema na ilungi ya bawu. Nzambi telemaka kuna, ke tala yawu. Kasi bawu kwikilaka ti Yandi kele Nzambi. Bawu sungikaka masumu ya bawu. Bawu yidikaka konso kima mbote-mbote, yina bawu lendaka sungika. Bawu kwikilaka ti Yandi vwandaka Nzambi.

<sup>55</sup> Na yawu bawu kotaka na dibulu ya tiya. Kaka na ntangu ya nsuka, Yandi kwisaka kuna na kati ya matuti, na likalu ya mupepe, mpe manisaka ngolo ya tiya samu na bawu, na ntangu Yandi vwandaka pesa kikesa na bantima ya bawu mpe ke tuba na bawu.

<sup>56</sup> Nzambi ke sala ti lukwikilu ya beno kukota na kisika mosi ya mpasi sika wapi yawu ke pesa mvutu.

<sup>57</sup> Kuvwandaka na Job, ya Ngwisani ya Ntama, na ntangu Satana, mufundi ya beto, fundaka yandi ti yandi vwandaka nsumuki ya kinsweki. Kasi Job zabaka ti yandi sumukaka ve. Yandi zabaka ti yandi sungikaka konso kima yina yandi salaka, mpe yandi pesaka munkayulu mosi kuna. Yawu yina vwandaka ndombilu ya Nzambi. Nzambi vwandaka lomba, munkayulu mosi mpe mfunguna. Mpe Job salaka bima yina nionso.

58 Mpe Satana tubaka, “Mu ke baka bakamela ya yandi, samu yandi ke mvwama. Mu ke baka mameme ya yandi.” Mpe na nsuka yandi bakaka yina vwandaka na kati ya ntima ya yandi, bana ya yandi.

59 Na nionso yina, Job ninganaka ve samu yandi zabaka ti Nzambi, mbote, yandi kwikilaka ya kieleka ti Yandi vwandaka Nzambi, samu yandi tubaka na Yandi, mpe yandi zitisaka misiku ya Yandi. Yandi talaka mbote-mbote mpe monaka ti, “Mu me pesa munkayulu yina lombamaka. Mu tubaka, ‘Mbala yankaka na ntangu mwana na munu ya bakala salaka nkinzi, mpe bana ya munu ya bakento vwandaka mpe kuna, mbala yankaka bawu sumukaka na kinsweki na kati ya bantima ya bawu, samu na yawu mu ke pesa munkayulu samu na bawu mpe mu ke sungika bifu na kisika ya bawu.”

60 O Nzambi! Na ntangu muntu mosi me zitisa yina Nzambi tubaka na yandi na kusala, yandi ke kwikila ti Yandi kele Nzambi, Yandi ke pesa mvutu. Ntangu nionso, lukwikilu ke kotisa Yandi na kusalu.

61 Na ntangu beno me sala yina kele mbote, na ntangu beno me zitisa misiku ya Yandi nionso, na ntangu beno me sungika bifu mpe beno me sala yina kele mbote, mpe beno me vutula konso kima na kisika na yawu, mpe beno me tulula yawu na ntuala ya Nzambi. Ata ti Yandi me vwanda swi, Yandi ke kaka Nzambi, mpe ke vingila ti lukwikilu yina kukota na kusalu. Beno me sala bisalu na beno, ntangu yayi Yandi zola mona lukwikilu na beno na nzila ya bisalu ya beno. Yandi zola mona yina beno ke sala.

62 Kana ba me pakula beno mafuta mpe me sambila samu na beno, Nzambi ke vingila na kumona yina beno ke kwikila na yina me tadila yawu. Kana beno ke kwenda nswalu ve na Lumingu ke kwisa, mpe na kilumbu ke kwisa, samu munganga yina me kwisa na mbanza. Yandi ke vingila na kumona mvutu ya beno na nzila ya lukwikilu ya beno. Kuvutuka na manima ve, kilumbu ke kwisa, na kutubaka, “Mu ke wa nzutu mbote ve, mu me mona ti mu belukaka ve.” Na kubanda, beno me lunga ve samu na ndonga ya bisambu. Beno me lunga ve. Beno me lunga ve. Beno me kubama ntete, ve. Beno ke kwikila ve ti Yandi kele Nzambi. Mu kele ve . . .

63 Beno lunga tuba, “Mpangi Branham, mu ke ndima ve yina nge ke tuba.” Bisalu ya beno ke talisa yina beno kele. “Beni ke zaba bawu na bambuma ya bawu.” Kana muntu mosi kutuba ti yandi ke Muklisto, mpe yandi ke nwa diaka malafu, ke nwá makaya, mpe ke bula bansaka ya mbongo, mpe ke tuba bima ya mvindu, mpe ke tuba ti, “Ndambu ya Biblia ke ya kieleka, mpe ndambu yankaka ve,” yandi lenda longa Nsangu ya mbote, mpe ke manga kitini ya Biblia, yandi ke kaka nsumuki. Yandi me sungama, ntete ve.

64 Kasi na ntangu beno ke tuba pwelele ti Nzambi ke kaka Nzambi ya mutindu mosi, mpe beno ke pesa luzingu ya beno na maboko ya Yandi, na kutubaka, “Mfumumu, mu kele ntoto; Nge ke Muntu yina ke salaka banzungu ya ntoto,” na yawu beno lomba nionso yina beno me zola. Lukwikilu ke katuka ve. Yawu ke telema kaka kuna.

65 Ata ti bampasi kukwisa na diboko ya kibakala mpe ya kikento, kasi lukwikilu yina ke katuka ata fioti ve, samu beno ke kwikila ti Yandi kele Nzambi. Mpe kana Yandi kele Nzambi, Yandi ke zitisa nsilulu ya Yandi. Yandi lenda sala nsilulu ve mpe kumanga yawu. Kana Yandi ke Nzambi, Yandi ke zitisa nsilulu ya Yandi. Oh, mu zola yawu mingi. Yandi ke zitisa yawu.

66 Job pesaka munkayulu ya yandi; yandi sungikaka konso kima. Yandi zabaka ti yandi vwandaka ya kusungama. Mpe awa kwisaka bantu ya dibuundu, mabuundu ya ba denomination yankaka, mpe tubaka, “Job, kulutila mbote nge ndima ti nge ke nsumuki, samu Nzambi lunga pesa nge ndola ya mutindu yayi ve kana nge ke nsumuki ve.”

67 Kasi Job tubaka, “Mu sungikaka masumu ya munu. Mu pesaka munkayulu na Nzambi, mpe mu ke nsumuki ve.” Yandi zabaka sika wapi yandi telemaka. Na yawu mambu nionso kumaka yimbi mingi, kaka yimbi mpe yimbi mpe yimbi, kaka mpasi mutindu yawu lendaka vwanda, samu na kubwisa Job, mpe kunata Job na kisika yina yandi lenda manga Nzambi mpe munkayulu yina. Kaka na ntangu beno ke manga diambu yina beno ndimaka ntete, yina ke talisa kulemba ya beno, yina ke talisa ti beno ke tula ntembe na Nzambi. Kana beno me lomba kima mosi na Nzambi, mpe beno ke tula diaka ntembe, na yawu beno ke muntu ya ntembe kasi mukwikidi ve.

68 Job zabaka sika wapi yandi telemaka, mpe yandi telemaka mbote-mbote na zulu ya fondasio yina.

69 Na yawu Perronet tubaka, na ntangu ya lufwa na yandi:

Na Klisto, Ditadi ya ngolo, mu me telema;  
Kisika yankaka nionso kele mfututu.

70 Na zulu ya ditadi ya ngolo ya kundima ya Job, ata kento ya yandi ya zola yambulaka yandi. Na ntangu mavimpi ya yandi bebaka mpe yandi vwandaka ya kufulukuka na bamputa, mpe vwandaka kukikwansa na kikombo mpe singaka kilumbu yandi butukaka. Yandi tubaka, “Bika ti mwini kubasika ve! Bika ti ngonda kubikala kaka na kati ya mpimpa.”

Kento ya yandi tubaka, “Job, nge ke muntu ya mpasi mingi. Samu na yinki ve nge lenda singa Nzambi mpe kufwa?”

71 Yandi tubaka, “Nge ke tuba mutindu bakento ya zoba.” Yandi kwikilaka kieleka ti Nzambi vwandaka, mpe yandi zitisaka misiku. Oh, munu ke wa kinzambi. Yandi zabaka ti yandi zitisaka misiku ya Nzambi, mpe yina sukisaka yawu.

Nzambi wwandaka meka lukwikilu ya yandi. Yandi ke meka lukwikilu ya beno. Yandi ke meka mpe ya munu.

<sup>72</sup> Kasi na ntangu beto me zitisa misiku ya Yandi, “Beno balula bantima ya beno mpe beno baka mbotika na Nkumbu ya Yesu Klisto samu na lemvo ya masumu ya beno, mpe beno ke baka dikabu ya Mpeve-Santu,” yawu yina nsilulu ya Yandi. “Kana muntu mosi ke bela na kati ya beno, beno bokila bambuta ya dibuundu. Bawu pakula bawu mafuta, mpe bawu sambidila bawu. Kisambu ya lukwikilu ke belusa mbevo, mpe Nzambi ke vulusa yandi.” Yina ke sukisa diambu. “Beno sungika bifu ya beno, mosi na yankaka, mpe sambidila mosi na yankaka.” Beno me zitisa misiku ya Nzambi.

<sup>73</sup> “Bidimbu yayi ke fidisa bayina nionso ke kwikila. Na Nkumbu ya Munu bawu ke basisa bampeve ya yimbi; bawu ke tuba bandinga ya malu-malu; kana bawu simba banioka to bawu nwa ndikila, yawu ke sala bawu yimbi ve; kana bawu tetika maboko ya bawu na zulu ya bambevo, bawu ke beluka.” Yina ke sukisa diambu.

<sup>74</sup> Kwikila kieleka na Nzambi. Ndimba ya kieleka, na kati ya bantima ya beno, beno ke kwikila ti yina ke Ndinga ya Nzambi. Job kwikilaka mutindu yina.

Kento ya yandi tubaka, “Samu na yinki nge ke singa Yandi ve samu nge fwa? Samu na yinki, nge ke kuma yimbi kulutila yimbi ntangu nionso.”

<sup>75</sup> Tala mutindu Satana ke tubaka na beno banding ya mutindu yina. “Samu na yinki, nge ke beluka ve kubanda ntangu bawu pakulaka nge mafuta. Nge ke beluka ve kubanda ntangu misadi ya Nzambi sambilaka samu na nge. Na kubanda, misadi ya Nzambi ya bawu kele ya kusungama ve.” Yawu ke diambu ya musadi ya Nzambi yina ve. Yawu ke lukwikilu na beno na Nzambi ya moyo, yawu yina ke mfunu. Yawu kele ve yina musadi ya Nzambi kele; yina Nzambi kele. Musadi ya Nzambi pesaka nsilulu mosi ve; Nzambi ke yina pesaka nsilulu. Yawu ke tala ve musadi ya Nzambi; yawu ke tala kaka Nzambi, mpe lukwikilu ya beno samu na kukwikila yina Nzambi kele. Na yawu kwikila kieleka na Nzambi. Kwikila kieleka ti yina ke Nzambi, mpe yina ke Ndinga ya Nzambi. Mpe Nzambi ke na kati ya Ndinga ya Yandi.

<sup>76</sup> Mpe Job tubaka, “Nge ke tuba mutindu nkento ya zoba.” Yandi tubaka, “Mfumu pesaka, mpe Mfumu me botula; Nkumbu ya Mfumu kusakumuka.” Yandi kwikilaka kieleka ti Nzambi wwandaka kuna.

<sup>77</sup> Mpe na ntangu yandi basisaka yawu na yinwa ya yandi, banzasi bandaka na kungana mpe bansemo bandaka na kupela. Nzambi kotaka na kusalu. Yawu ke kotisa Yandi na kusalu. Yandi wwandaka swi ntangu ya yinda.

<sup>78</sup> Yandi ke salaka mutindu yina. Kimvuka ya bantu ya Amerique ya difelo, bakwikidi ya luvunu ya mabuundu. Mu ke na nganzi ve. Kasi disumu ke pesaka nganzi na muntu yina ke ya kusungama na Nzambi. Mu ke na nganzi ya yinsi ve, nganzi ya bantu ve, kasi mu ke na nganzi ya diabulu yina ke sala bima yayi samu na kufwa meso ya bantu.

<sup>79</sup> Bifwa meso yayi ya ba pasteur mpe balongi yayi ke bika bawu twadisama na mwa theologie ya bantu. Beno butuka mbala ya zole. Mpe Nzambi ke zitisaka Ndinga ya Yandi. Beno tala mutindu Yandi ke lembika bawu. Yawu ke mbote beno ndima ti Nzambi kele. “Na nkadulu ya kinzambi, mpe ke manga yina ke pesaka Ngolo.”

<sup>80</sup> Kento yayi ya leke, mpe ya mputu, zabaka ti Yandi vwandaka Nzambi. Mutindu kitunga yina vwandaka kulumuka, kulumuka, kulumuka, kulumuka, mambu kumaka yimbi mingi mpe yimbi na zulu ya yimbi, ntangu nionso. Kasi Nzambi bikaka yawu kwenda mutindu yina. Yandi ke zolaka kusala mutindu yina. Yandi ke zolaka kumeka lukwikilu ya beno, mpe kumona yina beno ke sala, kubika ti bawu pakula beno mafuta mpe bawu sambila samu na beno, mpe beno kuma yimbi mingi. Yandi tubaka, “Kwenda, Satana, meka yandi. Mu zaba ti yandi ke kwikila na Munu.” Bika Nzambi kusakumuka kukonda nsuka! Oh, la la! [Mpangi Branham me bula maboko mbala zole—Mu.] “Meka yandi ntangu yayi. Mu zaba ti yandi kwikilaka Ndinga ya Munu.” Yandi lenda tuba mutindu yina samu na beno?

<sup>81</sup> Yandi tubaka mutindu yina samu na Job. Yandi tubaka, “Sala konso kima yina nge me zola, kasi kubaka moyo na yandi ve, samu Mu zaba ti yandi ke zolaka Munu. Yandi pesaka dikabu. Yandi zitisaka misiku. Yandi salaka yina Mu tubaka na yandi na kusala, mpe yandi ke kwikila yawu. Ntangu yayi sala yandi nionso yina nge me zola.” Yandi bakaka yandi bima nionso. Nzambi pesaka yandi yawu mbala zole na ntangu Yandi sungikaka yandi. Ya kieleka, Yandi ke sala yawu.

<sup>82</sup> Yandi ke meka lukwikilu ya beto, kutala kana beto ke kwikila ti Yandi kele Nzambi.

<sup>83</sup> Kento yina ya leke, na ntembe ve, yandi tubaka, “Mu sambilaka. Mu sambilaka. Mu zaba ti mu ke Muntu ya makanda yina me lunga ve.”

<sup>84</sup> Bambuka moyo, Yesu ke zonzila yandi na kati ya Biblia. Yandi tubaka, “Mifwidi ya bakento vwandaka mingi ve na bilumbu ya Elie? Kasi yandi kwendaka kaka na mosi, mpe yandi vwandaka Muntu ya makanda.”

<sup>85</sup> “Oh,” yandi tubaka, “Mu sambilaka.” Mbala yankaka, na ntangu yandi monaka gateau yina ya nsuka, lufwa kotaka na mwelo ya lupangu mpe kwisaka na kielo ya yinzo. Munzimba mosi, ya fioti mingi, mpe yandi na mwana ya yandi ke fwa. Mu lenda mona yandi, mpimpa nionso, ke sambila, mipepe yina ya

mwini ya ngolo, mpe ntoto kuyumaka, mpe bantu ke vwandaka dila mpe ke boka na babala-bala. Yandi tambulaka, na kati ya yinzo. Yandi talaka mwana ya yandi ya fioti. Yandi talaka mwa pinzama ya yandi; yawu nionso vwandaka ya kutobuka, mpe misapi ya yandi ya makulu ya kubasika na nganda. Yandi talaka maboko ya yandi mosi, mpusu na yawu kumaka ngolo. Yandi tambulaka awa mpe kuna, kasi yandi tubaka, “Mu zaba ti Yandi ke Nzambi. Mu sungikaka mambu nionso. Mu salaka konso kima Yandi lombaka. Mu ke lomba baluzingu ya beto, samu na nkembo ya Yandi.” Nzambi monaka yandi.

<sup>86</sup> Na ntangu bayankaka kwendaka makinu ya nene kisika mosi kuna, mpe ke kukikumisa kitoko bawu mosi, samu na kukifwanikisa na yina beto ke bokila bubu yayi television to nionso yina, kutwadisama na biese ya yinza yayi. Kasi kento yina vwandaka yandi mosi na Nzambi.

<sup>87</sup> Tongo tanaka. Yandi tubaka ti, “Nkundi yayi ya leke me boka mpimpa ya muvimba samu na kuzwa kima ya kudia. Yinki mu ke sala na mwa diboko mosi yayi ya faline?”

<sup>88</sup> Beno zaba ti, faline yina vwandaka Klisto. Konso longoki ya Biblia kuzaba ti Klisto vwandaka dikabu ya Faline. Mpe faline yina ya lutambiku lendaka nikama kaka na masini ya mutindu yankaka, mpe, tii kuna yawu ke zengana na bitini ya mutindu mosi; samu Yesu Klisto ke mutindu mosi, mazono, bubu yayi, mpe kukonda nsuka. Mpe konso mukwikidi ke kwikilaka yawu mpe me vwanda kuna. Alleluia! Beno lunga baka bisambu nionso ya madidi, mpe ya nganda mutindu beno me zola. Samu na munu, mu ke kwikila ti Klisto ke mutindu mosi mazono, bubu yayi, mpe kukonda nsuka. Mu me baka lukanu na yinza yayi ya bantu ya masumu. Mu ke kwikila kaka ti Yandi ke mutindu mosi mazono, bubu yayi, mpe kukonda nsuka.

<sup>89</sup> Ba masini yina zengaka konso mbuma mutindu mosi, samu Yandi ke mutindu mosi. Yandi ke kaka Nzambi mosi yina Yandi vwandaka ntete, ntangu yayi Yandi ke ya kieleka, na suka yayi. Yandi ke vwanda kaka mutindu mosi. Yawu yina ke tendula faline.

<sup>90</sup> Mpe mafuta ke talisa Mpeve, mutindu beto zaba yawu na kulanda Ezekiel 4, mpe nionso yina. Kikuma yawu yina beto ke pakulaka bantu mafuta; yawu ke Mpeve. Yinki? Mutindu Santu Jean 4, “Tata ke sosa bayina ke sambila Yandi na Mpeve mpe na Kieleka.” Yesu vwandaka Kieleka. Yandi vwandaka dikabu ya Faline, mpe mafuta yayi vwandaka Mpeve. Mpe Mpeve, ya kuvukisa na Kieleka, ke basisa kaka kima mosi. Tula yawu kisika mosi, yawu ke sala gateau. Oh!

<sup>91</sup> Wapi lukwikilu ya beno? Yinki ntangu Ndinga ya Nzambi longamaka na kukikulumusa na Yawu nionso, ata mpe na Ngolo na Yawu, ti Yesu Klisto ke mutindu mosi mazono, bubu yayi, mpe kukonda nsuka, mpe Ndinga kumaka Faline, beno ke na Mafuta

samu na kuvukisa Yawu kisika mosi. Mbala yankaka Yawu ke kaka diboko mosi, to lutu mosi, kasi, nionso yina yawu kele, yawu ke ya kieleka.

<sup>92</sup> Ntangu yayi yawu me fwanana na yinki? Yawu me fwanana na kulunsi. Yawu me fwanana na dikabu na nge mosi. Yawu yina beno lenda sala. Kana Ndinga longamaka, mpe beno bakaka Mpeve mpe Yawu me vukana kisika mosi, yawu ke munkayulu ya beno mosi samu na kumanga bampasi nionso, kumanga konso kimbevo, kumanga konso kima yina ke telemina Ndinga ya Nzambi, mpe kutelema na zulu na yawu.

<sup>93</sup> Munganga tubaka *yayi*, *yina*, to *yankaka*; yawu ke sala kima mosi ve. Beno telega mbote-mbote na zulu na Yawu, samu Nzambi tubaka yawu. Faline me kwisa. Beno me baka Mafuta. Beno me vukisa Yawu kisika mosi.

<sup>94</sup> Ntangu yayi, mu ke wa ndinga mosi. Tongo me tana. Ndinga ke tuba, mpe tubaka, “Basika na lupangu mpe baka bankuni zole.” Beno me bakula, Disonuku tubaka “Bankuni zole”? Kulunsi. Yandi bakaka faline mpe mafuta, kasi yandi me bokilama, na kusala kisalu ntangu yayi; beno sala na yawu kisalu. Ata yinki kiteso beno ke na yawu, kiteso ya Faline to ya Mafuta mutindu ke nsatu ya beno, kasi beno lenda sala kisalu; munkayulu ya beno mosi.

<sup>95</sup> Bankuni zole. Na ntangu ya ntama bawu vwandaka na mutindu ya mbote ve ya kupedisa tiya. Beno baka nkuni mosi mpe tula yawu na zulu ya nkuni yankaka, pedisa yawu na kati-kati, pusa bansongi nionso zole. Bantu ya Inde ke pedisaka tiya ya bawu mutindu yina. Mu me simbisaka tiya mutindu yina, na bambala mingi, na mpimpa ya muvimba. Mu bakaka kitini ya yinti, mu tulaka yawu mutindu *yayi*, mpe mutindu *yina*, mpe pusaka yawu na kati ya tiya na mutindu yawu vwandaka pela.

<sup>96</sup> Bankuni yina vwandaka kulunsi. “Bankuni zole,” Biblia tubaka. Ndinga tubaka, “Kwenda na disamba mpe baka bankuni zole.” Kaka na ntangu yina, na zulu ya mongo, ndinga mosi bokaka mutindu nzasi mosi mpe tubaka na profete, “Kwenda na mbanza. Mu me tuma.” Oh, la la! Bawu nionso zole tumamaka. Kima mosi lendaka salama. Bawu nionso zole me tumama.

<sup>97</sup> Kana musadi ya Nzambi ke longa Ndinga, mpe muntu yina ke yamba Yawu ke kwikila Yawu mpe ke sadila Yawu, kima mosi ke salama. Kana beno ke nsumuki, beno ke vuluka. Kana beno ke bela, beno ke beluka, samu Nzambi silaka yawu, kana beto ke kwikila kieleka na Nzambi.

<sup>98</sup> Mutindu mosi Yandi ke Nzambi, Yandi ke zitisa Nsilulu ya Yandi. Ya kieleka! Musiku vwandaka, “Kwenda na mbanza, samu mu me tuba na mufwidi mosi ya nkento.” Vision monanaka na ntwala ya profete. Yandi ke kwisa, ke tambula. Yandi zabaka ve sika wapi yandi vwandaka kwenda; kasi yawu salaka luswaswanu mosi ve. Yandi me tumama kaka.



<sup>99</sup> Yandi zabaka ve sika wapi bankuni vwandaka, kasi bankuni zole vwandaka na kati ya disamba kisika mosi kuna. Yandi bandaka na kukwenda. Yandi kwendaka na disamba. Yandi talaka na lweka ya yandi, “Oh, yinki mwini yayi!” Kuboka ke basika na mbanza, bimpumbulu ya mpimpa kuna, ke tekita, ke vutuka na kwiti ya malafu, mpe nionso yina. Yandi talaka na bala-bala. Yandi monaka kima ve. Yandi monaka nkuni mosi; kitini ya kulunsi, munkayulu ya beno mosi. Yandi zwaka kitini yankaka, nkuni mosi. Mpe yandi bakaka nkuni yina ya zole. . .

<sup>100</sup> Oh, yinki ntangu ya mpasi yawu lendaka vwanda, lufwa vwandaka na kielo ya yinzo ya yandi. Yandi na mwana ya yandi lungaka kudia kitini mosi ya dimpa mpe kufwa. Yawu yina kaka. Mpe mbala yankaka, kaka na kati-kati ya mudidi mingi, beto ke wa ndinga mosi.

<sup>101</sup> Na ntangu yandi bakaka nkuni yina ya zole mpe bandaka na kuvutuka, yandi waka ndinga mosi kuna na mwelo ya lupangu, ke tuba ti, “Natila munu ndambu ya masa na dikopa.”

<sup>102</sup> Yandi balukaka samu na kutala, na bankuni zole na maboko ya yandi, mafuta ya kuvukisa mpe ya kukubika mbote-mbote. Yandi tubaka ti yandi kubikaka yawu, yandi vukisaka yawu kisika mosi. Yinki yina, Ndinga na Mpeve, ya kuvukisa kisika mosi. Tula yawu na zulu ya kulunsi ya dikabu ya beno mosi, samu na kumanga konso kima yina ke swaswana na yina beno lombaka. Ya ke mbote. “Mu vukisaka yawu, ntangu yayi mu ke kwenda baka bankuni yayi.”

Mpe ndinga yina tubaka, “Natila munu mwa masa ya kunwa, na dikopa.”

<sup>103</sup> Yandi talaka, mpe monaka muntu mosi me telema kuna, mpe me yekama na mwelo, na matama ya kuniefama, na mandefu mingi, na dibandi, ke tala na lweka ya mwelo, me lwata mpusu ya ntama ya dimeme. Yawu monikaka ti yandi vwandaka muntu mosi ya ntama mpe ya lutondo.

<sup>104</sup> Yandi tubaka, “Mu ke kabula masa ya munu na yandi.” Masa ya Luzingu, beno zola pesa yawu na muntu nionso, kutubila yawu na muntu nionso, mpe kukwenda konso kisika yina. “Vingila fioti, tata.” Yandi balukaka na bankuni na maboko ya yandi.

<sup>105</sup> Mpe ndinga bokaka mutindu nzasi, “Kukabula masa ya nge kaka ve, kasi natila munu diaka kitini ya dimpa na diboko na nge.” Dimpa ya luzingu; masa ya luzingu! Ya luzingu? Yandi lendaka kufwa na ntangu yina zolaka mana. “Natila munu masa ya nge mpe dimpa ya nge.”

<sup>106</sup> Yinki beno ke mona awa? Yinki dilongi beno lenda kuzwa awa? “Sosa ntete-ntete Kimfumu ya Nzambi, mpe kieleka ya Yandi; bima yankaka nionso ke pesama na beno.”

“Natila munu mwa masa mpe kitini ya dimpa.”

107 Na kati ya kulemba ya yandi, yandi balukaka. Mu lenda mona yandi ke tuba, “Tata,” kima ya mutindu yina, “nge me swaswana na bantu nionso mu me monaka ntete, mpe bantu yina me tubaka na munu. Nge ke monana ti nge ke na kieleka na yina nge ke tuba. Kasi mu ke kaka na mwa faline, na diboko mosi kaka, mpe lutu mosi kaka ya mafuta. Mu kubikaka yawu, mpe mu ke lamba yawu na bankuni yayi zole. Mpe mu ke dia yawu, munu na mwana ya munu, mpe beto ke fwa. Yawu yina kaka mu ke na yawu.”

108 Yinki beto ke wa, diaka, na manima? “Kasi, natila munu ntete, kitini ya dimpa.” Nzambi, ntete. Kutala ve yina muntu ke tuba, mpe nionso yina, konso kidimbu yina, ata ti yawu me kuma mpimpa mingi, konso kima yina yawu lunga vwanda, baka ntete, Nzambi. Ndinga ya Yandi, ntete.

109 “Munganga tubaka ti mu lenda beluka ve.” Kasi, Ndinga ya Yandi, ntete. “Mu ke nsumuki ya nene. Mu ke kento ya pité. Mu ke bulaka bansaka ya mbongo. Mu ke nwaka malafu.”

Ndinga ya Nzambi, ntete. “Kana masumu ya beno ke mbwaki mutindu ngola, yawu ke kuma mpembe mutindu mvula mpembe; mbwaki mutindu tukula, yawu ke kuma mpembe mutindu mika ya mpembe ya dimeme.” Nzambi, ntete.

110 “Kwenda, natila mu kitini ya dimpa, ntete. Nionso yina ya nge ke na yawu, natila munu yawu.” Nge zola pesa yawu na maboko ya Yandi?

111 Luzingu ya munu, mpe nionso mu kele. Mu ke na bamvula makumi tanu. “Nge zola, William Branham, kupesa yawu na Munu? Beno zola, beno bana ya fioti, na kupesa Munu baluzingu ya beno? Beno me zola? Beno lenda sala yawu, beno bambevo? Beno lenda tula kivuvu na Munu? Beno pesa Munu kisika ya ntete.”

112 “Nata kitini ya dimpa na diboko ya nge, mpe natila munu mwa masa.” Yandi talaka yandi. Kima mosi tubaka na yandi ti muntu yayi zaba mbote yina yandi ke tuba.

Nzambi zaba Bantu ya Yandi. “Mameme...Mameme ya munu kuzaba Ndinga ya Munu. Bawu zaba mpe kana yawu ke Masonuku to ve, mpe kana yawu ke kieleka to ve.”

113 Yandi balukaka, na bulemvo nionso. Tala yina beno lunga sala. Mpe na ntangu yandi balukaka, samu na kutumama na yina profete tubaka na yandi, tala nzasi mosi kwisaka na Zulu, yawu yina muntu nionso ke sosa na kuwa. Na yawu, ndinga ya profete basikaka mutindu nzasi, yawu yina konso nsumuki mpe konso mbevo ke vingila na kuwa, “MUTINDU ME TUBA MFUMU.”

114 Mbala yikwa beto ke na nsatu ya kuwa Yawu! Beno bambuka bantu yina me telema na nzila ya yinzo ya munu, mpe ke tuba, “Kwisa na kisika yayi. Mwana ya munu ya kento ke na *yayi*. Bebe ya munu, ya munu, ke ya kulemba mingi, to nionso yina. Tuba

kaka ndinga mosi.” Yinki mutindu kutuba yawu na ntwala yawu vwanda na yinwa ya beno? Yawu ke vwanda nzonzolo ya beno mosi. Kasi bawu ke vingila na kuwa, “MUTINDU ME TUBA MFUMU.”

<sup>115</sup> Yawu yina, ke kwisa na lweka ya lupangu, samu yandi tumamaka. Mpe mawa nionso manaka. “MUTINDU ME TUBA MFUMU. Kitunga ke kita ve, to bwati ke yuma ve, tii na kilumbu yina Mfumu Nzambi ke tinda mvula na zulu ya ntoto.” Oh, wapi kiese na ntima!

<sup>116</sup> Yandi salaka dimpa. Yandi pesaka yawu na profete. Yandi vutukaka mpe salaka ndambu yankaka samu na yandi mpe mwana ya yandi. Mpe bawu diaka mpe nwaka, bilumbu mingi na zulu ya ntoto.

<sup>117</sup> Yawu katukaka wapi? Yinki mutindu yawu kotaka yawu kuna? Beno tuba na munu na mayele ya kimuntu wapi faline yina katukaka. Wapi sika mafuta yina katukaka? Yinki mutindu yawu kotaka na dibungu yina? Yandi yumisaka yawu, konso suka. Yandi manisaka faline na kitunga, konso suka, mpe yawu vwandaka ya kuyuma. Kasi na ntangu yandi vutukaka diaka samu na kutala, yawu vwandaka kuna. Yawu katukaka wapi? Baka Nzambi na Ndinga ya Yandi. Kwikila kieleka na Nzambi. Yandi ke Musadi.

<sup>118</sup> Beno lunga vwanda na mavimpi ya mbote ve. Beno lunga zimbana bankundi ya beno. Baka Yandi na Ndinga ya Yandi. Kwikila kieleka ti Yandi kele Nzambi. Bantangu ya mpasi beno ke lutisa na ntangu yayi, lenda monika mpimpa mingi ve kana beno lunga baka Ndinga ya Yandi mpe kana beno lunga kwikila kieleka ti Yandi kele Nzambi.

<sup>119</sup> Na yinsi Allemagne, na ntangu me luta, mu monaka kizizi mosi, mpe yawu vwandaka yangisa munu ntangu nionso. Mifikudi-mukubu ya yinsi Allemagne tendaka yawu . . . kizizi yina—yina bawu bokilaka “Yinsi ya matuti.” Mpe na ntangu beno ke tala yawu, na ntama, yawu ke monana kima mosi ya boma yina beno me monaka ntete ve. Kizizi ya matuti kisika mosi, na ntangu beno ke tala yawu na ntama. Kasi kana beno tala yawu mbote-mbote, yawu ke soba. Ya ke Bawanzio ke bula mapapu ya bawu na kimvuka, ke yimbila alleluia na Mfumu. Yina ke mutindu mpasi ke vwandaka na bantangu yankaka. Kana beno tala yawu, na ntama, yawu ke monana mpimpa mingi mpe mudidi mingi. Kasi baka Nzambi na Ndinga ya Yandi mpe kwikila kieleka ti Yandi ke Nzambi, mpe pamuka na zulu mpe kangama na yawu, beno ke bakula ti yawu ke kaka Bawanzio ke bula mapapu ya bawu na kimvuka.

<sup>120</sup> Yandi fwananaka fioti na Abraham, yina bokilamaka na kupesa nionso yina yandi vwandaka na yawu, kutula yawu na mesa ya munkayulu. Mbala yankaka beno ke bokilama mutindu yina, na suka yayi. Kubika banzila ya beno. Kubika kukondwa

lukwikilu ya beno. Kubika konso kima yina beno ke na yawu. Mpe kubaka Mafuta na Ndinga, mpe vukisa Yawu kisika mosi, mpe kutula Yawu na zulu ya mesa ya munkayulu ya beno mosi. Beno ke bakula ti, Yawu ke kotisa Nzambi na kisalu, kaka mutindu mu me telema awa na chaire.

Beno banza na yawu na ntangu beto ke sambila.

<sup>121</sup> Beno ke na nsatu ya kima mosi bubu yayi? Beno ke na nsatu yina me luta ngolo ya beno? Beno ke na mbongo ve samu na kufutula yinzo? Bana ke na nsatu ya basapatu ya malu-malu, kasi beno ke na mbongo ve ya kusumbila bawu yawu? Kitunga ya faline ke ya mpamba na yinzo ya beno, mpe bwati ya mafuta ke pene-pene ya kuyuma? Beno lunga sumba madia ya bitwisi ya beno ve? Mpe, kuna, kima mosi ke tambula mbote ve? Bambuka moyo ti, Yandi pesaka nsilulu.

<sup>122</sup> Beno ke mbevo, mpe munganga me tuba ti beno ke luta na lipaso? Beno ke na mbongo ya kulunga ve? Beno ke na nsatu ya kima mosi.

<sup>123</sup> Beno ke nsumuki? Nsatu ya beno ke ya kulutula nene, ti kana Nzambi bokila, bubu yayi, beno lungaka zimbana? Beno ke retrograde yina ke tina ntama ya Nzambi? Mpe beno zaba ti beno ke kotaka na dibuundu mosi, kasi beno zaba ti beno ke ya kusungama ve? Ntima ya beno ke tuba na beno, na nzila ya Ndinga, ti beno ke ya kusungama ve. Mpe beno ke na nsatu mosi. Kubika ve bandinga yayi kubwa na ntoto ya bansende, to na zulu ya matadi, bantima ya matadi. Bika ti yawu kubwa na ntoto ya mbote, mpe ya kitoko.

<sup>124</sup> Kana beno ke mbevo mpe beno . . . munganga ke tuba ti beno lenda beluka ve, mpe beno me sila na Nzambi ti beno ke sadila Yandi bilumbu nionso ya luzingu ya beno, mpe beno ke kwikila kieleka ti Yandi kele Nzambi, beno me zitisa misiku ya Yandi. Kana beno ke na nsatu ya kima mosi, beno telemisa diboko ya beno na Nzambi, ti beno ke na nsatu ya kima mosi? Nzambi sakumuna beno.

Beto sambila.

<sup>125</sup> O Mfumu, kaka mutindu mu me telema na chaire na suka yayi, mu zaba ti yawu ke na diboko mosi ve yina ke na zulu kukondwa Nge zaba yawu, samu Nge ke Nzambi. Nge tubaka ti, “Banswini mingi ke tekama ve na mpata zole? Mbala yikwa beno me luta banswini!” Mbala yikwa Nge ke mona maboko ya bantu yayi ya lufwa, yina Mwana na Nge Yesu fwaka samu na bawu! Mbala yikwa Nge me mona maboko ya bawu kulutula mutundi Nge lunga tala nswini mosi, kubwa na suka yayi! Mu banza ti . . . banswini kumi na zole lunga tekama ve na mpata mosi na suka yayi, samu muntu mosi ve ke zolaka yawu. Mpe yawu ke mpasi na kuzika yawu. Kasi Nge zaba mosi na mosi ya bawu; Nge zaba konso dinsala yina ke fika nzutu ya bawu. Nge zaba konso lunsuki yina ke na zulu ya bayintu ya bawu.

<sup>126</sup> O Mfumu, pesa mvutu na bisambu. Bika ti bawu kwikila kieleka, na suka yayi, ti Nge ke Nzambi, mpe Yawu ke Mpeve ya Nge. Bika ti buzoba mpe biese ya bisambu ya bilumbu yayi kukwenda ntama ya bawu, na kutubaka, “Oh, mu ke mosi ya dibuundu *yayi*.” Nzambi, bika ti yawu zimbana na mabanza ya bawu, kaka na ntangu yayi. Na ntangu yayi, bika ti bawu tala kaka na Luzingu ya Kukonda nsuka. Na yawu bawu ke sosa mpe ke vwanda na nzala na Yawu, mpe kuzaba yina Nzambi kele, mpe bawu kwikila kieleka ti Yandi kele. Yandi ke zitisaka nsilulu ya Yandi.

<sup>127</sup> Na bansumuki, bika ti bawu balula bantima ya bawu na nswalu nionso, bawu kubama samu na mbotika na Nkumbu ya Yesu Klisto. Mpe Nge silaka ti Nge ke pesa bawu Mpeve-Santu. Nge tubaka yawu, Mfumu. Nge ke zitisaka Ndinga ya Nge.

<sup>128</sup> Kele na retrograde yina ke kwikila ti Nge ke Nzambi, mpe bawu me zimbana nzila. Bika ti bawu kwisa bubu yayi, samu Nge tubaka ti, “Ata ti masumu ya beno ke mutindu ngola, yawu ke kuma mpembe mutindu mvula mpembe. Mbwaki mutindu tukula, yawu ke kuma mpembe mutindu mika ya mpembe ya dimeme.”

<sup>129</sup> Mpe samu na bambevo, bika bawu bakula ti Nge ke Nzambi. Nge ke zitisaka Ndinga ya Nge. Nge ke zitisa kaka Ndinga ya Nge. Mutindu bawu ke kukipesa bawu mosi, na Mafuta ya bawu, mpe Mpeve yina ke na kati ya bawu ke talisa ti bawu ke kwikila. Mpe, na Ndinga, diaka, Dimpa ya Luzingu yina ba me kabula, Klisto; yina nikama na kati ya bawu, na Ngwisani ya Ntama; mpe Ngwisani ya Malu-malu, samu na kutalisa ti Yandi ke mutindu mosi mazono, bubu yayi, mpe kukonda nsuka. Bika ti bawu vukisa Ndinga yayi na Mafuta, Mpeve, yina bawu ke na yawu, mpe bawu telema na autel yayi, na kutubaka, “Yayi ke nionso mu ke na yawu, Mfumu. Mu ke nata yawu.”

Oh, mbala yikwa Nge ke bidika yayi! Mbala yikwa ya ke bokila Nzambi ya masolo na kukota na kisalu! Mbala yikwa Yehowa, na ntima ya kiesa lungaka tuba, ti, “Mu ke na mwana yina ke tumamaka na Munu. Mu mekaka yandi, mpe yandi me talisa ti yandi ke zolaka Munu mpe yandi ke kwikila na Munu. Yandi ke kwikila kieleka ti Munu kele.” Samu yawu me tubama ti, “Yina ke kwisa na Nzambi fwana kwikila ti Yandi kele, mpe ya ke pesaka musendo na bayina ke sosaka Yandi.” Pesa yawu, na ntangu yayi, mutindu beto ke pesa yawu na Nge.

<sup>130</sup> Mpe, ntangu yayi, kaka na ntangu beto me kulumusa bayintu ya beto. Mpe bayina ke na nsatu ya konso kima yina, beno lenda telema, kana beno zola. . . Ntangu yayi, kana beno ke kwikila kieleka ve ti Yandi kele Nzambi. . . Kana beno ke kwikila kieleka ti Yandi ke Nzambi, Yandi ke lungisa nsilulu ya Yandi, mpulusu, kubeluka ya nzutu, mpe konso kima yina, kana beno ke kwikila kieleka ti Yandi ke Nzambi, beno telema. Kana beno ke na muntu

yankaka yina beno zola sambidila, beno telema. Kana beno ke—kana beno ke kwikila ti Yandi ke Nzambi, beno zabisa nsatu ya beno na ntwala ya basantu. Beno sala yawu mutindu beno ke telema. . . [Kisika ya mpamba na bande—Mu.]

“Mu ke kwikila kieleka ti Yandi ke Nzambi. Mu ke kwikila ti Yandi ke zitisaka Ndinga ya Yandi. Mpe mu ke kwikila ti nsatu ya munu. . . Munu me tulula yawu na nsi ya Menga, na ntangu yayi.” Kana beno me sala mutindu yina, beno me tulula konso disumu, konso. . . Disumu ke kukonda kundima. Nge lenda vwanda mosi ya dibuundu, kasi mu ke tubila disumu, “Kukonda kundima” ya beno. Beno tulula yawu mutindu munkayulu. Beno ke tambika yawu. Beno ke kwisa na kulunsi. Beno ke tambika munkayulu, ntangu yayi, ya kukonda kundima ya beno nionso. Mpe beno ke pesa Yandi yawu, mpe beno ke kwikila ti Yandi kele, mpe beno ke kwikila kieleka ti Yandi ke pesa mvutu. Kana beno ke kwikila yawu, beno telemisa diboko ya beno. Beno bikala mutindu yina.

<sup>131</sup> Mfumu, Nge ke Nzambi. Tala Mafuta mpe Masangu ya bawu, kisika mosi. Bawu me nata Yawu na kulunsi, sika wapi Tiya ya Nzambi ke kota na bantima ya bawu (kana bawu ke na kieleka) mpe ke yoka munkayulu ya bawu. Nge ke kota na kisalu, mpe ke matisa masa yina ke bumbama. Ke kulumuka na Zulu, na pusu-pusu ya Tiya. Nge ke ningisa mazulu na ntoto, samu na kupesa bawu mvutu.

<sup>132</sup> Mutindu bawu me telama kuna na maboko ya bawu na zulu, samu na kutalisa ti bawu ke kwikila, mpe bawu me kukipesa bawu mosi, mpe konso nsatu yina bawu ke na yawu, kaka na zulu ya mesa ya munkayulu ya Nge. O Nzambi ya Zulu na ntoto, Zuzi ya Zulu na ntoto, ya kieleka Zuzi ya Zulu ti ya ntoto ta kumisa yawu mbote mingi. Ya kieleka Yandi ke zitisa Ndinga ya Yandi, Nge Yina zaba bantima ya babakala, na bakento, bantima ya bantu yayi.

<sup>133</sup> Mfumu Nzambi, mu me telemisa mpe diboko ya munu, samu mu zaba ti mu me soba kisalu ntangu yayi. Mpe mu ke kwikila ti Nge kele. Mu monaka Nge kuna na Dikunzi ya Tiya. [Mpangi Branham me bula na chaire mbala tatu—Mu.] Mu monaka Nge ke swasikisa binsweki ya bantima ya bantu. Ata na ntangu mosi ve Nge me bwaka. Nge silaka yawu na ntangu Nge salaka yawu kuna, na simu ya nzila awa, na ntangu Nge bandaka kusala mambu yayi. Mpe Nge kebaka munu na yinza ya muvimba, mpe bifulu nionso mpe bisika nionso. Mu ke ndima ti Nge ke Nzambi. Ya kieleka mu ke kwikila yawu.

<sup>134</sup> Mu ke kukipesa munu mosi na bantu yayi, mpe mu ke tambika na Nge, bima nionso mu ke na yawu, Mfumu, samu na kisalu. Munu me banda diaka, Mfumu, na kusala nzietelo na yinza ya muvimba. Sadisa munu, O Nzambi. Kana mu kwikilaka na Nge ve na konso ntangu yina, lolula masumu ya munu. Lolula

kukonda kundima ya munu. Mu zaba ti Nge kele, mpe yina ke pesaka musendo na bayina ke sosaka Nge.

<sup>135</sup> Mutindu, mu ke sungika masumu ya bantu ya munu, na suka yayi, kulemba ya bawu mpe bantembe ya bawu, mutindu bawu me telema na maboko ya bawu na zulu. Mu ke lombalemba ya masumu ya bawu, Mfumu, mpe kulemba ya beto nionso. Tinda Mpeve-Santu na zulu ya bawu, na kidimbu ya kundima ya Nge, ti Nge ke Nzambi. Mpe Nge ke awa na kuyamba beto na ntangu yayi, mpe kubaka beto na maboko ya Nge, mpe kuvutula na beto konso kima yina beto zimbisaka. Kana yawu ke mavimpi ya beto, bika ti yawu vutukila beto mbala nkama. Kana yawu ke mioyo ya beto, bika ti yawu kwisa na beto na banfelele ya mbote, yina ke sema, ya kifuluka na Mpeve-Santu, samu na kutalisama na ntuala ya Nzambi. Kana yawu ke kukonda kundima, bika ti yawu vutuka na beto, Mfumu, na mutindu ya lukwikilu yina ke na kiyeka ya kukatula bamongo. Pesa yawu, Mfumu.

<sup>136</sup> Beto ke kwikila ti Nge ke sala, Mpeve-Santu ke tiamuka na kati ya yinzo yayi, na zulu ya bantu yayi, mpe na kati ya bantima ya bawu, mpe ke ningisa bawu na kundima Nzambi ya moyo. Beto ke sala yayi na Nkumbu ya Yesu Klisto.

Lukwikilu ya munu ke tala na Nge,  
Nge dimeme ya Calvaire,  
Mvulusi ya kinzambi;  
Wa bisambu ya munu na ntangu yayi,  
Nata ntama masumu ya munu nionso,  
Mu zimbana ve  
Ntama na Nge.

<sup>137</sup> Beno me bakula yawu? Beno me yamba yawu? Beno telemisa diboko ya beno, mpe tuba, “Mu me yamba yawu ntangu yayi. Mu ke kwikila na Yandi.”

Na ntangu mu ke tambula na mpimpa ya luzingu,  
Mpe bampasi ke kuma mingi pene-pene ya munu,  
Vwanda Ntwadisi ya munu;  
Sala ti mpimpa kukuma nsemo,  
Katula boma ya munu nionso,  
Kubika ve ti mu kwenda  
Ntama ya Nge.

Beto kulumusa bayintu ya beto.


<sup>138</sup> Na manima ya Nsangu yayi ke ngana, ya ngolo; yina ke zenga, mpe yina me longaka na mutindu ya ngolo mingi, kasi yina ke Kieleka. Mpe kana beno ke kwikila na kukikumusa nionso ti yina beno lombaka, beno ke baka yawu, bika ti kima mosi ve kubasisa beno na nzila ya mbote. Beno telema kaka kuna. Yawu vwanda konso mutindu yina mu me longa, mpe nionso yina mu lenda sala, to nionso yina muntu mosi lenda sala,

yawu ke sala kima mosi ve tii kuna beno ke ndima yawu mutindu kima ya beno mosi.

<sup>139</sup> Kana beno ke kwikila na bantima ya beno ya muvimba ti, konso kima yina beno lombaka, kana beno sungikaka masumu ya beno, Nzambi me pesa beno lemvo. Beno tula diaka ntembe ve. Kana beno ke retrograde, beno me vutuka na kisika ya beno, na suka yayi. Kana beno ke na nsatu ya Mpeve-Santu, na yawu beno baka mbotika na Nkumbu ya Yesu Klisto samu na lemvo ya masumu ya beno. Ya ke Ndinga ya Nzambi. Yandi ke soba Yawu na dibuundu mosi ve, na denomination mosi ve, to na muntu yankaka. Ya vwanda kaka mutindu yina. Beto zitisa misiku ya Yandi, misiku ya dibuundu ve, kasi misiku ya Yandi. Yawu yina kaka beto lunga sala.

<sup>140</sup> Yandi tubaka, “Kisambu ya lukwikilu ke belusa mbevo.” Kana beno kele mbevo, mu sambilaka kisambu ya lukwikilu samu na beno. Beno me sala yawu na kati ya bantima ya beno. Mpe beno kwikila yawu, ndima yawu, mpe telema mbote-mbote na zulu na yawu. Yawu ke vwanda kaka mutindu yina. Kima mosi ve lenda katula yawu, ata ti yawu ke monana mpimpa mingi.

<sup>141</sup> Beno ke tuba ti, “Mbote, ya ke monana ti mu ke kaka mbevo.” Yina kele ve . . . Ya ke kaka Bawanzio ke bula mapapu ya bawu kisika mosi. Yawu yina kaka. Yawu ke Nzambi na mutindu ya lusakumunu. Yawu ke monana mpimpa samu na beno. Beno finama mpe beno tala yawu diaka, beno tala kana yawu ke Nzambi ve yina me telema kuna, yina ke zitisa Ndinga ya Yandi.

<sup>142</sup> Na ntangu beto me kulumusa bayintu ya beto, mu ke vutula kisalu na Mpangi Neville, pasteur ya beto. 



*KWIKILA KIELEKA NA NZAMBI* KNG59-0125

(Be Certain Of God)

Nsangu yayi ya Mpangi William Marrion Branham, kulongamaka na Kingelesi, na suka na Lumingu, na kilumbu ya 25 ya Ngonda ya ntete, na mvula 1959, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na buku na muvimba nionso na buku na Kingelesi. Lubangulu yayi na Kituba basisamaka na buku mpe ba kabulaka yawu na Voice Of God Recordings.

KIKONGO-KITUBA

©2019 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)